

# Nuwe Lied Bediening

En Hy het 'n nuwe lied in my mond gegee, 'n lofsang tot eer van onse Elohiem (Ps. 40:4)

E-pos: [kontak@nuwelied.info](mailto:kontak@nuwelied.info)  
Webwerf: <http://www.nuwelied.info>

*Yeshua is die Boom van die Lewe. Wanneer ons die Torah bestudeer moet ons onthou dat Yeshua Messias die Lewende Torah is – die Woord van YHVH wat vlees geword het. Hy is die weg na die waarheid wat lewe gee – die Lewende Manna wat uit die hemel gestuur is. Sonder Yeshua wat deur die Afgesonderde Gees in ons, en deur ons lewe, sal die geskrewe Torah net die dooie letter van die wet wees!!*

**Parashah 18: Mishpatim (משפטים)** – regsuitsprake; riglyne; verordeninge.

*Hierdie is die regsuitsprake wat jy hulle moet voorhou.* Ex. 21:1 – PWL<sup>1</sup>

**Torah:** Exodus 21:1 tot 24:18.

**Haftorah:** Jer. 34:8 tot 22; Jer. 33:25 en 26.

**Nuwe Verbond:** Matth. 5:38 tot 42; Matt. 15:1 tot 20; Mark. 7:1 tot 23; Luk. 7:1 tot 8:3; Heb. 9:15 tot 22 en 10:28 tot 39.

Hierdie notas is aanvullend tot die vorige notas vir parashah 18 wat afgelaai kan word by: [Parashah18Notas14](#) of by [Parashah18Notas15](#).

*Many mourn for their sins that do not truly repent of them, weep bitterly for them, and yet continue in love and league with them – Matthew Henry.*

*The recognition of sin is the beginning of salvation – Martin Luther.*

*Because it has been so united with the devil it is vital for man to receive from God a change of mind before he can receive a new heart – Watchman Nee.*

*Repentance is more than just sorrow for the past; repentance is a change of mind and heart, a new life of denying self and serving the Saviour as king in self's place – J.I. Packer.*

*God's law is a thing of beauty because it's an expression of who he is – Izzy Avram*

<sup>1</sup> Alle teksverwysings is geneem uit PWL Vertaling, behalwe waar anders vermeld. Die PWL Vertaling (Pad van Waarheid tot die Lewe) kan gratis afgelaai word by [www.padwlewe.ch](http://www.padwlewe.ch), maar is ook nou in gedrukte formaat beskikbaar. Om 'n kopie van die Bybel te bekom kan Gerrie Coetzee per e-pos by [padwlewe@yahoo.com](mailto:padwlewe@yahoo.com) of telefonies by 074 361 2134 gekontak word.

## Torah Bespreking

### Gewapen vir die stryd!

*Dit het so gebeur dat יהיה die seuns van Yisra'el, volgens hulle leërafdelings, op daardie selfde dag, uit Mitzrayim uitgelei het. Ex. 12:51 Hand. 13:17*

*God het die volk daarom omgelei op die pad van die wildernis na die Rooisee. Die seuns van Yisra'el het gewapend uit Mitzrayim uit opgetrek. Ex. 13:18*

Israel het volgens hulle leërafdelings en gewapen uit Egipte getrek. Hulle was gereed vir enige moontlike oorlog, want YHVH het hulle met 'n verhewe arm, naamlik met 'n vertoning van God se Almag, uitgelei! YHVH het die arm van Faraó gebreek (Eseg. 30:21). Paulus beskryf dit soos volg:

*Die God van hierdie mense het ons vaders gekies en die mense opgelig en vermeerder toe hulle vreemdelinge in Mitzrayim was en hulle met 'n verhewe arm daar uitgelei. Hand. 13:17*

Hierdie is ook 'n raak beskrywing van ons verlossing uit die Egipte van sonde wat ons gevange gehou het as slawe van sonde! Yeshua is die verhewe arm van YHVH waarmee ons uit die slawerny van sonde bevry was!!

*Hy het vir julle, wat dood was deur julle sonde en die onbesnedenheid van julle menslike natuur, lewe gegee saam met Hom en ons al ons sondes vergewe.*

*Hy het die geskrewe aanklag teen ons, wat vir ons nadelig was, deur Sy Outoriteit, uitgevee en uit ons midde weggevat en dit aan Sy kruis vasgeslaan.*

*Deur Sy liggaam af te lê, het Hy die heersers en outoriteite gestroop en hulle in die openbaar beskaam deur Sy wesenlike self. Kol. 2:13 tot 15.*

'n Soldaat word opgelei om te veg; om waar nodig is aan te val en waar nodig is om te verdedig. Maar dit is nie 'n soldaat se taak om vrede te maak nie! Daarom moet ons die woorde van Yeshua onthou soos dit opgeskryf is in Matt. 10:34 tot 39:

***Moenie dink dat Ek gekom het om vrede op die aarde te bring nie. Ek het nie gekom om vrede te bring nie, maar 'n swaard,***

*want Ek het gekom om tweedrag te verwek tussen 'n man en sy vader en tussen 'n dogter en haar moeder en tussen 'n skoonogter en haar skoonmoeder;  
'n mens se vyande sal die kinders van sy huishouding wees.*

*Wie 'n vader of moeder meer liefhet as vir My, is My nie waardig nie en wie 'n seun of dogter meer liefhet as vir My, is My nie waardig nie en elkeen wat nie sy kruis optel en My volg nie, is My nie waardig nie. Wie ook al sy lewe self verloor om My ontwil, sal dit vind. Wie ook al sy lewe self vind, sal dit verloor.*

### Bepeins of Bespreek

1. Is ons georganiseerd en bewapen vir ons wildernistog in hierdie wêreld? 'n Swaar gewapende soldaat van ouds was beskryf as *khalutzeem*. Is jy 'n *khalutzeem* – iemand wat swaar gewapen is vir die oorlog? 'n *Khalutzeem* is ook 'n pionier, 'n baanbreker, iemand wat sy pad oop sal veg! Is jy regtig bereid om openlik standpunt in te neem oor jou

geloofsoortuiging? Wat doen jy om die waarheid te verkondig? Is jy al vervolgd en het jy al oneer gelyk terwille van Sy Naam en die Waarheid? Lees Hand. 5:38 tot 42.

2. Neig ons nie almal om verkieslik ‘rusbank-gelowiges’ te wees nie? Is die woorde van Leonard Ravenhill van toepassing op jou toe hy gesê het: *How can you pull down strongholds of Satan if you don't even have the strength to turn off your TV?*

### **Jy Moet Jou Naaste Liefhê Soos Jousef**

*Mitzvah* (meervoud: *mitzvot*) is die oorkoepelende naam vir al YHVH se bevele (opdragte) en kan soos volg onderverdeel word:

- *Mishpatim* is die sosiale, sedelike en morele opdragte vir ‘n suksesvolle en vreedsame samelewing. Byvoorbeeld Exodus hoofstukke 21, 22 en 23). Dit is regsuitsprake (riglyne) op grond van Torah.
- *Eidot* is die opdragte (bevele) wat ons uitvoer en wat as getuine dien van ‘n feit of ‘n gebeurtenis wat plaasgevind het. Byvoorbeeld Ex. 13:9 (Tefilin – gebedsboksie); Num. 15:37 (Tzitzit – klossies) en Ex. 20:8 (Shabbat).
- *Chukkim* is die insettinge (opdragte) wat ons nie (ten volle) verstaan hoekom ons dit moet doen nie. Byvoorbeeld Ex. 23:19 (mag nie ‘n bokkie in sy moeder se melk kook nie) en Deut. 22:11 (mag nie wol en linne meng nie).

Parashah *Mishpatim* handel hoofsaaklik oor ons verhouding met ons medemens en dit begin met die *mishpatim* ten opsigte van slawe (Ex. 21:1 tot 11). Ons kan dan wel die vraag vra of Torah ten gunste van slawerny is? Die antwoord is te vinde in die onderskeid tussen ‘n Hebreeuse slaaf en ‘n nie-Hebreeuse slaaf! Die *mishpatim* (regsuitsprake) in Ex. 21:1 tot 11 is ten opsigte van Hebreeuse slawe, met ander woorde ten opsigte van volksgenote. Maar ons moet onthou dat ‘n gemengde menigte van mense – mense van gemengde bloed – het ook saam met Israel uit Egipte getrek (Ex. 12:38). Die regsuitsprake ten opsigte van Hebreeuse slawe was ook op hierdie menigte van mense van toepassing. Hulle was deel van Israel – dit was hulle medemens.

Die hoofdoel van hierdie *mishpatim* was tweeledig, naamlik;

- Dit het verhinder dat die rykes super-ryk sou word en
- Dit het die armes ‘n geleentheid gebied om ekonomies weer selfstandig te word.

Dit beteken dat elke sewende jaar het daar ‘n gedeeltelike verdeling van rykdom of gelykstellende aksie plaasgevind. Maar dit het op so ‘n wyse plaasgevind sonder om hardwerkendheid en vindingrykheid in die kiem te smoor. Hierdie onderrig en instruksies van YHVH kan nie met kommunisme of sosialisme vergelyk word nie, maar was bedoel om vir die armes te sorg op ‘n wyse wat hulle menswaardigheid sou herstel. Dit kan ook gesien word as ‘n daad van naasteliefde en ‘n demper op geldgierigheid. Aangesien dit ‘n daad van gehoorsaamheid aan Torah is, sal YHVH die ryke weer (en met meer?) oorvloedig seën.

Daarom lees ons in hierdie week se Haftorah (Jer. 34:8 tot 22; Jer. 33:25 en 26) dat een van die groot redes vir die vernietiging van die eerste tempel was weens Israel se handeling ten opsigte van die Hebreeuse slawe!

Tydens die profetiese bediening van Jeremia het Israel in vele opsigte Torah verontagsaam, soos byvoorbeeld die *mishpatim* ten opsigte van Hebreeuse slawe. Die gevolg van hierdie handeling was dat YHVH se strafgerigte teen Israel op hande was en dit blyk dat die uitbuiting van hulle minder bevoorregte landgenote YHVH se oordeel bespoedig het. In die lig van die naderende Babilon-bedreiging het Israel hulle sonde besef, hulle verootmoedig en onderneem om getrou volgens Torah te handel deur alle Hebreeuse slawe vry te laat. So lees ons in Jer. 34:15

*Alhoewel julle onlangs omgedraai het en gedoen het wat reg is in My oë, om elkeen vrylating aan sy naaste aan te kondig en julle 'n verbond gesluit het voor My Teenwoordigheid, in die huis wat na My Naam genoem is,*

Maar toe die bedreiging van Babilon egter blyk om oor te wees, het Israel die verbond verbreek en die slawe wat vrygelaat was, gedwing om weer in hulle diens te wees.

*het julle tog gedraai en My Naam (Karakter en Outoriteit) onteer en elkeen het sy slaaf en sy slavin wat julle vrygelaat het volgens hulle begeerte, teruggevat en julle het hulle in onderdanigheid gebring om julle slawe en slavinne te wees; Jer. 34:16*

Met hierdie optrede het Israel 'n bespotting van YHVH en Sy Torah gemaak. Hulle optrede was bevestiging dat hulle nog nie die besnydenis van hulle harte ondergaan het nie. Israel se geldgierigheid en gemaksgedrag het voorkeur bo YHVH en Torah gehad. Die gevolg hiervan word in die woorde van Jeremia duidelik:

*daarom, so sê יהוה: 'Julle het nie na My geluister om vrylating aan te kondig, elkeen vir sy broer en vir sy naaste nie. Let op, Ek kondig 'n vrylating aan vir jou,' verklaar יהוה, 'tot die swaard, die pes en die hongersnood en Ek sal van julle 'n verskrikking maak vir al die koninkryke van die aarde.*

*Ek sal die manne wat My verbond oortree het, wat nie die woorde van die verbond nagekom het wat hulle voor My Teenwoordigheid gesluit het nie, toe hulle die kalf in twee stukke gesny en tussen die stukke deurgeloop het;*

*die amptenare van Y'hudah, die amptenare van Yerushalayim, die hofamptenare, die priesters en die hele volk van die land wat tussen die stukke van die kalf deurgegaan het; Ek sal hulle gee in die hand van hulle vyande en in die hand van die wat hulle lewe soek en hulle lyke sal kos wees vir die voëls van die hemel en vir die wilde diere van die aarde.*

Jer. 14:17 tot 20.

Hierdie dien as voorbeeld en waarskuwing van die gevolge indien ons nie ons naaste liefhet soos onself nie.

*Jy moet יהוה, jou God, liefhê vanuit jou hele verstand, wil en emosie, vanuit jou hele gees, vanuit al jou kragte en vanuit al jou verbeelding en begrip. Dit is die eerste en grootste opdrag en die tweede, wat net soos dit is: jy moet jou naaste liefhê net soos jouself. Matt. 22:37 tot 39.*

Ons optrede teenoor en ons verhouding met ons medemens is 'n getuigenis van ons verhouding met ons Hemelse Vader. Ons kan dit ook anders stel, naamlik: Torah leer ons dat ons verhouding met YHVH moet gelykstaande wees aan, en 'n weerspieëling wees van, ons alledaagse verhouding met ons medemens. Die apostel Johannes verduidelik dit soos volg:

*Wie daarom ook al sê dat hy in die Lig is terwyl hy sy broer haat, is steeds in die duisternis. Wie sy broer voortdurend liefhet, bly in die Lig en daar is geen oortreding in hom nie, maar*

*hy wat sy broer haat, is in die duisternis en leef in die duisternis en weet nie waarheen hy gaan nie omdat die duisternis sy oë blind gemaak het. 1 Joh. 2:9 tot 11.*

Die nougesette toepassing van die *mishpatim* – die regsprake van YHVH – is die waarborg vir ‘n vreedsame en ordelike samelewing.

Die wyse om ons medemens te behandel kan opgesom word in hierdie woorde van John Wesley:

*Do all the good you can, by all the means you can, in all the ways you can, in all the places you can, at all the times you can, to all the people you can, as long as ever you can.*

Hierdie is die versekering dat ons die *mishpatim* ten opsigte van ons medemens nougeset sal nakom!

Opsommend: Hierdie week se parashah, *mishpatim*, is die eerste praktiese toepassing van *jy moet jou naaste liefhê soos jouself!* Dit is as te ware stap een van die proses om Israel te vorm tot ‘n koninkryk van priesters en ‘n afgesonderde volk ten einde YHVH se eiendom uit al die volke te wees (Ex. 19:5).

### **Bepeins of Bespreek**

1. ‘n Hebreuse slaaf kan dus ook gesien word as ‘n ‘werknemer’ in die diens van ‘n Hebreër. Die ekonomiese situasie het die Hebreër (slaaf) gedwing om sy dienste te verkoop. Is hierdie ook ‘n les hoe ons as werkgewers die moet behandel wat in ons diens is?
2. Wil jy leer om jou naaste beter lief te hê? Begin dan by iemand wat jy nie liefhet nie. Verwys 1 Joh. 4:7 tot 16 in die verband.
3. *Torah is for correction, protection and direction!!*

-o-o-o-o-o-o-o-

*Ontvang YHVH se Woord met welwillendheid, maar ondersoek self die Skrifte of hierdie dinge die waarheid is (Hand. 17:11).*

Shalomgroete.  
Johan.

Epos: [kontak@nuwelied.info](mailto:kontak@nuwelied.info)

Webwerf: <http://www.nuwelied.info>

*Kopieë mag gemaak en gratis versprei word, maar mag nie verkoop word nie. Geen veranderinge mag aan die oorspronklike teks aangebring word en dit dan onder die naam van Nuwe Lied Bediening versprei nie.*